

Der ander Artickel.

Wiewiel Amptleut auff dem Berge sein
sollen / vñ on sonderliche laube vom Ber-
ge nicht reysen.

Vnd auff das gemeinem Bergkwerck / wol
vñ nutzlich vorgestanden / vnser ordnung in nach
folgenden Artickeln / vleissig vnd vhest gehalten /
vnrecht gedempfft vñ gestrafft / gemeiner nutz ge-
fürdert / iderman sich bemelter Bergkwerck ge-
brauchende / gepürlicher Schutz / fried vñ gerech-
tigkeit / geleist werde / haben Wir auff gemelt berck
werck / einen tüglichen Hauptman an vnser stat /
darzu einen Bergkmeister / acht geschworne berg
vorstendige Männer / zwene Zehendtner / zwene
Dünnenreuther / Einen Aufsteiler / Einen Regen-
schreiber / vnd Bergkschreiber / gestellt. Auch Ge-
richt vnd Recht in Bergk vnd andern sachen zu
bekomen verordent / Vñ was itzlichem zuthun ge-
bürt / vnd eingebunden ist / wirdt sich aus nach
folgenden Artickeln clerlicher befinden. Vñ sollen
derselbig vnser Amptman / on vnser laube die an-
dern obbestimpten Amptleute / alle Schichtmei-
ster vñ Steiger / on vnser Hauptmans zulassung
nicht vom Berge reysen / denen auch one merck-
lich vrsach nicht soll erleubet werden.

*nota.
mutatis mut
andis.*

Der dritt Artickel.

Von des Hauptmans Ampte.

Zum ersten / soll vnser Hauptman / an vnser
stat vleissig auffsehen / das fried / gerechtikeit / vñ
A ij disse

fiatt.